

Diplomat perlu berhati-hati guna media baru elak bocor maklumat, kata Najib
Malaysian Insider
Feb 24, 2014
OLEH MD IZWAN

Datuk Seri Najib Razak (gambar) menasihati para diplomat yang bertugas di luar negara supaya berhati-hati dalam menggunakan media baru kerana rahsia kerajaan boleh terbocor.

Tidak menolak media baru sebagai platform penting, perdana menteri bagaimanapun berkata maklumat rahsia kerajaan yang dibincangkan secara tertutup boleh bocor kepada umum secara senyap-senyap.

"Tidak ketinggalan dalam menggunakan media sosial dan menjadi pengguna aktif adalah diperlukan zaman ini.

"Bagaimanapun, perlu hati-hati dalam apa yang dikatakan walaupun secara tertutup ia masih boleh terbocor di blog-blog secara tidak sedar," kata Najib semasa ucap terna di Persidangan Ketua Misi Ke-8 di Kuala Lumpur hari ini.

Penggunaan media sosial di Malaysia berkembang meluas di kalangan rakyat Malaysia, malah Najib sendiri memiliki akaun Facebook, Twitter dan Instagram.

Namun, Najib juga tidak terlepas daripada menjadi bahan kritikan di dalam media sosial, malahan kata jenaka "kangkung" juga menjadi bahan sindiran ke atas perdana menteri baru-baru ini.

Najib kemudian menggesa supaya wakil negara di luar negara supaya menyesuaikan diri dengan perkembangan teknologi yang semakin pantas.

"Sebagai penggubal polisi, diplomat dan anggota masyarakat antarabangsa memerlukan kita respon dengan perubahan ini, menyesuaikan diri dengan tren serta menjalankan tugas untuk memberi masa depan yang seimbang kepada rakyat kita," katanya.

Dengan kepesatan teknologi internet, rakyat Malaysia juga tidak ketinggalan menggunakan laman sosial, malahan jumlah pengguna laman sosial Facebook di Malaysia mencecah hampir 15 juta orang.

Kepesatan perkembangan media sosial kini kerana semua orang seperti boleh memiliki media sendiri.

Jika untuk memiliki media tradisional seperti televisyen, radio, atau akhbar memerlukan modal yang besar dan tenaga kerja yang banyak, maka lain halnya dengan media sosial.

Malaysia menjamin kebebasan Internet kepada orang ramai, dimana di bawah Rang Jaminan MSC Malaysia (MSC Malaysia Bill of Guarantees), kerajaan Malaysia berikrar tidak akan menapis Internet.

Bagaimanapun, Malaysia mempunyai beberapa akta berkaitan undang-undang siber yang diluluskan oleh Parlimen, iaitu Akta Komunikasi dan Multimedia 1998, Akta Suruhanjaya Komunikasi dan Multimedia 1998, Akta Tandatanganan Digital 1997 (Akta 562), Akta Jenayah Komputer 1997 (Akta 563) dan Akta Teleperubatan 1997 (Akta 564).

Akta Komunikasi dan Multimedia diperkenalkan bagi menggantikan dua akta terdahulu, iaitu Akta Telekomunikasi 1950 dan Akta Penyiaran 1998.

Akta Komunikasi dan Multimedia boleh dianggap sebagai teras kepada semua undang-undang siber di negara ini

Hakcipta © 2013 The Malaysian Insider

Source: <http://www.themalaysianinsider.com/bahasa/article/diplomat-perlu-berhati-hati-guna-media-baru-elak-bocor-maklumat-kata-najib>